

KAKO DJELUJE SAVJETODAVNA GRUPA?

Savjetodavna grupa za konsultacije sa javnošću, kao koordinator procesa, stvara uslove za provođenje Pravila, odnosno potpuno i djelotvorno učešće javnosti u izradi pravnih propisa, prije svega na način da:

- provodi konsultacije posredstvom internet stranice Ministarstva /Sekcija o konsultacijama sadrži sve potrebne informacije i dokumente o konsultacijama sa javnošću, te omogućava dvosmjernu komunikaciju između javnosti i Ministarstva/;
- primjenjuje druge, odgovarajuće metode konsultacija za propise koji imaju značajan javni uticaj /radionice, okrugli stolovi, simpoziji, rasprave stručnjaka u elektronskim ili pisanim medijima i sl./;
- upoznaje javnost sa godišnjim popisom normativno-pravne djelatnosti Ministarstva, odnosno propisima od značajnog uticaja na javnost;
- sačinjava i ažurira liste građana i pravnih lica zainteresovanih za redovnu komunikaciju o predloženim pravnim propisima;
- ocjenjuje provedene konsultacije.



**Propisi pisani
Vašom rukom!!!**

BOSNA I HERCEGOVINA MINISTARSTVO PRAVDE

PROVOĐENJE PRAVILA ZA KONSULTACIJE SA JAVNOŠĆU U IZRADI PRAVNIH PROPISA

Sve informacije o Pravilima, listu i nacrtu normativnih akata koji se planiraju donijeti ove godine, uputstva o tome kako možete učestvovati u izradi pravnih propisa i slično, dostupni su na internet stranici Ministarstva www.mpr.gov.ba.

**Posjetite nas, dajte svoja mišljenja, prijedloge i sugestije!
Budite i Vi dio tima koji zajedno gradi bolju budućnost Bosne i Hercegovine!!!**

Ministarstvo pravde Bosne i Hercegovine se zahvaljuje USAID JSDP-u koji je pomogao pripremu i realizaciju ove publikacije.

ŠTA SU PRAVILA ZA KONSULTACIJE U IZRADI PRAVNIH PROPISA?

Pravila za konsultacije u izradi pravnih propisa (Pravila) regulišu učestvovanje javnosti u izradi pravnih propisa od strane državnih ministarstava / „Službeni glasnik BiH“, broj 81/06/. Za razliku od drugih evropskih država, gdje se većina zahtjeva za učestvovanje javnosti javlja u vidu preporuka, Bosna i Hercegovina je napravila značajniji iskorak i odredbu o učešću javnosti u izradi pravnih propisa učinila obavezujućom.

Javnost obavezno učestvuje ne samo u izradi primarnih pravnih propisa, već i podzakonskih akata. Članovi 18. i 31. Zakona o upravi („Službeni glasnik BiH“, broj 32/02) predviđaju i konsultacije i rasprave o komentarima javnosti u izradi novih pravnih propisa.



Zakonske obaveze za učestvovanje javnosti u izradi zakona i podzakonskih akata Bosnu i Hercegovinu smještaju u prvi red po pitanju demokratskih inicijativa.

Svako državno ministarstvo je dužno:

- odrediti lice koje će biti zaduženo za konsultacije sa javnošću ispred ministarstva;
- sačiniti i ažurirati listu zainteresovanih lica sa kojima će redovno komunicirati o predloženim pravnim propisima;
- preduzimati određene minimalne korake u pravcu upoznavanja javnosti o svakom prijedlogu pravnog propisa;
- predložiti pravni propis, koji ima značajan javni uticaj i u čiju izradu bi se mnogo više trebala uključiti javnost.

Pravila utvrđuju opšte standarde za identifikovanje pravnih propisa koji imaju značajan javni uticaj, te svakom ministarstvu nalažu da usvoji vlastite standarde na osnovu pomenutih opštih smjernica.

Pravila uzimaju u obzir eventualne situacije kada se važni zakoni moraju usvojiti brzo, te predviđaju izuzetak od primjene obaveze za većim učestvovanjem javnosti.

Na kraju, Pravila zahtijevaju od svakog ministarstva da potvrdi da je njegov nacrt ili prijedlog propisa pripremljen uz poštovanje ovih pravila i ostavljaju mogućnost Vijeću ministara BiH i Parlamentarnoj skupštini BiH da odbiju razmatrati pravni propis, koji ne zadovoljava ove standarde.

KAKO MINISTARSTVO PRAVDE BIH PROVODI KONSULTACIJE?

Ministarstvo pravde Bosne i Hercegovine (Ministarstvo) je prvi državni organ u Bosni i Hercegovini koje je započelo provođenje Pravila za konsultacije u izradi pravnih propisa.

Svi zainteresovani građani i pravna lica imaju priliku direktno učestvovati u izradi pravnih propisa Ministarstva pravde Bosne i Hercegovine. Procesom javnih konsultacija želimo obezbijediti veći nivo učestvovanja interesnih grupa u zakonodavnim aktivnostima Ministarstva, bolju informisanost i veće povjerenje građana u proces izrade strateških politika.

Provođenje Pravila Vijeća ministara Bosne i Hercegovine detaljno je pripremano kroz analizu pravila i osnovnih informacija u pogledu konsultacija sa javnošću, sakupljanje informacija o spremnosti javnosti Bosne i Hercegovine za konsultacije, upoznavanje sa osnovnim konceptima i metodama provođenja konsultacija sa javnošću, utemeljenje i izradu plana rada Savjetodavne grupe za konsultacije sa javnošću (SGKJ), koju čine:

- sekretar Ministarstva pravde;
- pomoćnik ministra pravde u Sektoru za strateška planiranja, koordinaciju pomoći i evropske integracije (SSPKPEI), koordinator;
- šef Odsjeka za evropske integracije u SSPKPEI, koordinator provođenja konsultacija;
- pomoćnik ministra pravde za pravosudne organe;
- stručni savjetnik za odnose sa javnošću.